

## SAS UMBRAS DE SU SERO

M'illuminat su sole risulanu  
cand'isparghet a prima manzanada  
sos rajos d'oro. Sa terra ammagiada  
paret da-e s'incantu 'e s'aurora;  
su sero, accaldanadu a limba fora  
si che tuffat a modde in s'oceànu.

Comente esseret unu fanalinu  
calchi nue fuida da-e su mare,  
andat in boza de l'ostaculare.  
Tando li puntat su potente faru,  
la solvet, e risplendet pius giaru,  
sa nue si l'ingullit su terrinu.

S'omine puru lughet su manzanu  
ma est solu un'allutta un'istudada;  
chena nascher sa die est agabbada.  
Tando falan sas umbras de su sero...  
E li fascan su coro: e cussidero:  
it'est sa vida? Unu puzone in manu!

Eppuru donzi umanu abitadore  
chi custu non lu sentit da-e fundu,  
si crêt isse su primu 'e su mundu  
non esistit nè Deus e nè Santos;  
l'interessan sas glorias e bantos,  
sa vanidade, ch'est unu terrore.

E non solu in calchi occasione  
ma lu dimustrat finas ch'hat alenu;  
arragiolidu s'omine terrenu  
a s'interessu dat onzi valore,  
e non ponet in calculu s'amore  
imbreaugu 'e tanta illusione.

Si paralizzat cando nues bascias  
de improvisu iscuttinan sas alas;  
e pioen sas pius uras malas  
in sa carena sua addolorida,  
che-i su sole tentat un'isfida  
non lu favorin sas terrenas grascias.

Tando piumbat frittu che-i su nie  
s'iscuru 'e sa notte pius manna...  
Tancat sos ojos teteru che canna  
mentres su sole torrat rie rie.

## LE OMBRE DELLA SERA

*M'illumina il sole sorridente / quando proietta di primo mattino / i suoi raggi  
lucenti. La terra ammalata / sembra dall'incanto dell'alba, / al calar della  
sera, arroventato / si immerge negli oceani.*

*Come fosse un lumicino / qualche nuvola salita dal mare / timida osa  
ostacolarlo; / allora concentra il suo calore / la dissolve, e splende più chiaro  
/ la nuvola l'assorbe il terreno.*

*Anche l'uomo luccica nel mattino della vita / ma è solo una vampata, dura  
poco; / troppo presto la giornata s'imbrunisce / e scendono le tenebre fatali...  
/ che attanagliano il cuore e mi domando: / cosa mai è la vita? Un passero  
in mano pronto a scappare?*

*Eppure ogni abitante della terra / che non avverte questa realtà / s'immagina  
padrone assoluto: / non esiste Dio, né santi, / interessano le glorie terrene /  
le ambizioni che portano al terrore.*

*E non in qualche sporadica occasione / ma lo dimostra finché ha respiro; /  
accecato di vanità l'uomo mortale / all'interesse concentra tutti i valori; /  
trascura totalmente il calore umano / ubriaco di fasulle illusioni.*

*Si neutralizza quando "nubi d'angoscia" / all'improvviso scuotono le ali; / e  
fanno cadere le più tristi sofferenze / nella sua malferma esistenza, / come  
il sole tenta di dissolvere quelle nubi / ma rimane deluso come uomo mortale.*

*Allora scende, come una cappa gelida, / il buio della notte più lunga... /  
Chiude gli occhi tutto irrigidito / mentre il sole l'indomani si alza ancora più  
ridente.*